



Kibaru

A be bo kalo o kalo "AMAP" ka yamaruya kono - Hake : 16.000
"AMAP" kuntigi : Gawusu DARABO - Dilanbagaw kuntigi: Amadu GANI Kante - Sebenbagaw kuntigi: Basiriki TURE

Tarata, san 1991 Marisikalo tie 26 don

Musa Tarawele ka fanga binna




(a kunnafoniw be ne 3 ni 8 la.)



Walew latemen jekulu "CTSP"
sigira sen kan

Musa ni Mariyamu
n'u nakanmogow
bee lajelen
minera

"CTSP"
ka
Minisiri folo
sugandilen:
Sumana
SAKO



Nakosene ni jikongoya

Nin ye nogonbilasira walew ye, k'u jesin nakosenelaw ma, Mali kono an'a kokan, minnu b'a nin k'u ka senebaaraw nogaoya, ka soro ke, fo ka wasa, n'a ma ke ni segenko were ye.

A wale be fen min kunkan, o ye Ponpe Pedalima ye, n'a be wele ko «Sennaponpe», n'a be dilan Mali kono, an ka bololabaarakelaw yeref, minnu ka jekulu «A.E.T.A» jesmogoso be Kenzanbugu kin na :

Telefoni : 22-69-55 BP : 2031 Bamako (Mali)

Ponpe Pedalima wali sennaponpe

I - COGOYAW

Ponpe pedalima be dilan Mali ka bololabaarelaw fe n'o ye jekulu ye min sigira sen kan ton fila benkan hukumu kono. Ton fila in ye demedontonw ye jamana konyan : «A.T.I.» ye Amerikenw ka ton ye, «A.E.T.A.» ye Mali ka ton ye. Nin benkan in hakilinata ye ka dɔnniya lateme nakosenelaw ma walasa nogoya be don u ka jikogelya la. Mogow fanga de be ponpe in lataama. O be ke sababu ye ka sansi ni tulu jenini bali mansin fe anika tijeniw fana lasa, o la senefenw be kisi ja ma.

Ponpe pedalima ka ko ka nogo, wa a ka kene, a nafa ka bon. A be se ka ji hake min sama lere kelen kono o ye litiri 5.000 ye walima litiri 7.000 ye. N'a sigicogo jena, a be se ka nin ji hake sama lere caman kono ka soro ponpelilaw ma segen. Ponpe in be se ka ji labo. A b'a sama k'a seri. O koro ye k'a be se ka ji labo kolon, kono, kolon min dunya be se metere 4 wali metere 5 ma. A be ji seri jibolisiraw kono. Baliku kelen walima fila, walima denmisem caman be se ka baara ke ponpe pedalima la.

II - NEBILA BAARAW :


Saniibe ponpe bilabaara la, ibe mobilitulu numan ke puli akisi la. O numan ye min ye, i ka puli waraka walasa k'a don ko tulu kera akisi la kosebe.

Juru kise ka kan ka sigi cogo kerengeren na walasa pisiton kelen ka soro silendiri sanfela dan na, pisiton kelen to ka jigin ka sigi silendiri kono.

Jurukise ka kan ka ke fila ye walasa k'a kolo geleya. Ji ka kan ka sama ka bo kolon min kono, ponpe samalikeda ka kan ka jesin o kolon da ma. Furance ka kan ka bila pedaliw horoyoro ni kolon da ce, furance in dogoyalen ka ke metere kelen ye. O b'a to ponpelikelaw jiginto tenu bin kolon kono.

Ni pisitonw wolo jara u be jigin tuma bee bawo wolow te se ka ji kunben tugun barisa a man magan. N'o kera pisiton fila bee ka kan ka bila siyo ne kelen jila fo ka se miniti caman ma, o be se ka ke ka soro pisitonw kalaw ma bo pedaliw la. Ni miniti 15 kera ka wolow to ji la, n'u ma magaya i b'u kuru-kuru dɔnni-dɔnni i bolo la walasa u ka magaya. Ni wolow ka magan u be ben silendiri ma.

Ni pisitonw be don silendiri kono, feere bee ka kan ka tige walasa wolo min be duguma o kana kuru walima ka tige cogoya si la.



III - JI SAMANNI DAMINECOGO

N'i ye pedaleli damine, ji te sin ka yelen o yorɔnin kelen na. Fo ka pedalisen teliya walasa ka fine labo, ka ben ni ji samani ye.

IV - JIDON COGOYAW :

Jidoncogo caman be se ka ke ni sennaponpe ye. Ni yoro dugukolo boge ka fasan, ji be se ka don jiboliding labennenw fe, nakow kono, a mana ke nako fen o fen ye, korotalen walima nako min be ke ji la.

Ni yoro dugukolo cencen ka ca, ji be boli tiyow kono walasa ji tijeta kana caya ponpe ni nako sonnitaw ce. Tijet don, sennaponpe be se ka ji seri tiyo jamajan magaman kono senefenw kan. Nka o baaracogo be ponpelikela segen kojugu. Ni ji be don jibolisiraw fe, o baaracogo ka fisla ponpelikela ma n'o y'a soro ji tijenita man ca.

Cencenmayorow la, ji be se ka jense tiyo gelennw kono n'o ye «PWC» ye min da ye 45/50 ye. Nka, o wari ka ca. O la, a nininen don furanceba kana bila ponpe yere ni senefenw ce walasa wariko kana geleya mogow ma.

N'i ka dugukolo dakejenen te fo a jegennen don fan kelen fe, kolon senyoro ka kan ka ben sanfela ma, ka senefenw to dugumala la. Jibolidingew de senni bennen don. Ni dugukolo dakejenen don, kolon ka kan ka sen foro cemance la.

N'aw mago be kunnafoni werew la, aw be se demedonton ma n'o ye A.E.T.A. ye. A Telefoni nimoro ye 22-69-55 ye. A Negejuruso kesu, o ye BP : 2031 ye. A be Kenzanbugu k'a jesin «TOYOTA-DIAMA» la. Bamako (Mali).

Musa ka fanga binna

Ntənendon, san 1991 Marisikalo tile 25, wuladasumanin fe, Musa Tarawele minəna. A ka fanga binna. A furumuso, Mariyamu Sissoko an'u nōkanmogow bəe lajelen minəna. A ka pariti sigilen, «UDPM» sanfəbolo «BEC» mogow n'a ka Gofərenaman minisiriw yərew fana minəna. Depitew bəe wulila, k'u labila.

U minəbagaw ye sərədasi jekulu mögo 17 ye, minnu ye Lt koloneli Amadu Tumani TURE sugandi, k'o k'u nəməgo ye. Olu yərew y'a jira, ko n'i y'olu dusulen ye ka Musa Tarawele minə, ko Malidenw bəe lajelen ka səgen n'u katco de y'olu wale lateliya.

Kabini tumajan, Malidenw wulila, jamana kono an'a kōkan, k'i jo keləsen kan, ka yelema dajira Musa Tarawele la, a ka polititiko la, walasa a ka son pariti camanko ma Mali kono.

Musa Tarawele n'a furumuso n'u nōkanmogow mineli kunnafoni jənsenна, k'a da mögow tulo kan, ka ben «tarata» ma, san 1991 Marisikalo tile 26 don, min fana bennna san 1991 sunkalo tile 10 don ma.



Mali jekulu minnu wulila jama fanba togo la, o kera Baarakelaw ka jekulu ye ani lakolideñw ni kalandenw ka jekuluw ye sərədasiw ka jekulu nana minnu bolomadəmə.

Kuma suguya bəe kera Musa Tarawele fe. Ama son k'a ka politiki yelema. Naniya jira taamaw kera; gərewu kera ani tijeliw. A ma son k'a ka politiki yelema.

Adimina ka sərədasiw ni mugu ni kise bila ka mögow faga. Kalo saba hake kono, mögo minnu fagara Musa Tarawele ka sərədasi fanga fe, o bə se mögo 300 ma : lakolidenw ni kalandenw; baarakelaw ni musow, minnu denw tora a jahadikelé kene kan.

Tulomagelenya ani karogelenya ni

fagali de kera Musa Tarawele ka san 23 politiki tijeli sababu, mintun sinsi-nen bə pariti kelenko kan.

Musa Tarawele ye fanga ta san 1968 Nowanburukalo tile 19 don. O kera «tarata». A ka fanga binna san 1991 Marisikalo tile 26 don. O fana kera «tarata».

Mogo bə deli tuma min na, o tuma de y'i sabali tuma ye. Musa delila cogo bəe la : baaarakelaw; lakolidenw; kalandenw; musow ni kənəreyew. Musa delila dənnikela-kunda; k'a deli diine-kunda. Adelila Ala ni kira kəson. Ama son mögow ta ma. Nka, «tarata» san 1991 Marisikalo tile 26 don a sonna Ala ta ma...

Amadu GANJI Kante



Kibaru kanubagaw n'a

Baara juman këbaga ladegentan të

Salon anwy'a men arajo la ko maasinakaw ye ntöñfanbo ke, o de kéra sababu ye ka ntón caman bali ka tóro Maasina mara kono.

O de kama ntöñfaga seriwsida jemogó min be Falu, n'o ye Famori KULUBALI ye, a ye wele bila Falu dugu «42» mogó bee ma u k'u nesin ntöñfanbo ma.

O de hukumu kono an be yoro min na iko bi, ntöñfan caman de maralen b'a fe Faluyan. Dugu minnu ye ntöñfanbo inké, oye Suncarakaw, Siyebugukaw, Falukaw, Ntomodokaw ani Sidikoro n'a ka mogow ka bo kamalendugu. Ne dar'a la ni baara intaara jefé, san kelen, san fila, san saba, san naani walima san duuru kono an ka cikelaw be jötigé u ka forow kono, bawo a san fila ye ninan ye Falu arondisman cikelaw te jötigé ke Ala ni ntöñw sababu. Ne miiri la, ni ntöñfaga seriwsidaba sera ka baara in sinsin an ka jamana kono, ntöñko be dögoya kosebe.

Nuwali FOFANA
Sénékekuntigi ka bo Falu,
Nara serekili la (Mali).

Wasada Kunnafoniw

N'be nin bataki ci kibaruso jemogw ma, walasa k'an ka dugu kunnafoni daw jensem.

Wasada ye dugu ye min sigilen be Yanfolila worodugu yan fan fe ani Yanfolila ce ye kilo 15 ye.
Jinan sanji nacogo an ka dugu kono o file nin ye :
kalo 4 nan san 1990 sanji ye nako 2 ke :
5 nan san 1990 sanji ye nako 7 ke
6 nan san 1990 sanji ye nako 11 ke
7 nan san 1990 sanji ye nako 16 ke
8 nan san 1990 sanji ye nako 16 ke
9 nan san 1990 sanji ye nako 15 ke
10 nan san 1990 sanji ye nako 7 ke
O mumé kera sanji nako 74 ye.
Salon ta kera 72 ye.
O b'ajira ko ninan sanji cayara ni salon ta ye doonin.
Bibi in na, koorisene yiriwara kosebe an ka dugu la.
An yere kera dugu yiriwaton ye a san 5 ye ninan ye.
An b'an ka sannifeere ni baara caman werew ke, an yere ye.
O sababu bora balikukalan na.
N'be kibaru baarakelaw bee fo.
An be kunnafoni caman soró kibaru kalanni fe tuma bee.
N'ka foli be Mali jemogow ye. N'b'a nini u fe, hali bi, u k'u janto anw sénkalaw la.

Karamogó JALO
Wasada-Yanfolila (Mali)

Ka bo Jitumu

Nka foli be ke "KIBARU" lasebagaw a lakanabagaw n'a lafasabagaw bee lajelen ma.

Nbenna an ka dugu sanji kunnafoni lase an balima maliden tòw ma : sanji ye binni damine me kalo tile fôlo. Me kalo tile fôlo ni Setanburu kalo tile 26 sanji ye nako bi duuru ni fila ke Zuwen kalo la, sanji ye nako seegin ke

Zuluye kalo la, sanji ye nako tan ni wolonwula ke.

Utikalo la sanji ye nako taani naani ke.

Setanburukalo la, sanji ye nako seegin ke.

Danni damine na me kalo tile 20. Danniké jiko geleyali kera zuwen kalo satuma ye.

Anw ka sanjiko gelén kónni donna junini tuma ma. Suman ka ni anw fe yan.

Kenikew ni sañow ye kololila, finiw ni kabaw ni tigaw sera.

An bëna foli lase Sunba Samake ma. Nwoloje Fofo, Jenan njaki Bagayoko, Fajebugu, Isa Samake Kolena, foli bora Salifu Samake, yoro Jitumu Kolena.

Salifu Samake Animateri
Jitumu Kolena (Mali).

Nafa te woy la

Anw y'a kòlosi Woy cayara dijé kono Woy kun ye mun ye?

Nafolo ani fanga.

Nka nafolo min be don kelekeminénw na,

Nafolo min be don kelefén caman werew la, Tijeniba minnu be ke ka nafolo ni fanga niní Walima k'a kumabo,

kalanbagaw kuma yoro

Hadamaden minnu ni be tine fu,
 Anw nena nafa t'o la,
 Nafolo ni Fanga be se ka ke
 Ka kele werew ke
 Minnu te masiba kelew ye!
 O ye kele jumenw ye?
 Kongokelé
 Banajugukelé
 Kalanbaliya dibi kele
 Cefarinya be don nin kelew nesoro de
 la
 Bari o de be dije taa ne k'a nogoya
 Nogoya min be meen
 N'a be nafa lase bee ma

Awa Poli JALO
 «OMS» Bamako (Mali)

Folikan

Nin ye seben ye, min bora Sola
 animateri yoro, k' a ci kibaru ma.
 Anw ka foli be k'a nesin balikukan
 baarada mogow bee lajelen ma, ka
 arajo mali baarakelaw bee fo, an
 ma jine.

Mamadu nama jJara, Modi Suma-
 no ani Hind Kulubali ko, ka foli ani
 tanuni lase anw ka zafukuntigi ma,
 n'o ye Isa Dagaba Dabo ye, an'a
 furumuso Bintu Tarawele, u sigilen
 be Sirakorola.

KUMAKOROMA KELEN FILE :
 - Fen kelen be dije na, a konomia ka
 di bee ye, nka n'a jigin na, o ko
 mandi mogo si ye.
 O ye fen jumen ye ?

Seben cibagaw : Baje TARAWELE
 Burama KONARE
 Amadu KULUBALI
 Animateriw don, ka bo Sola,
 Sirakorola Zafu.
 KULUKORO (Mali).

Hakilijagabo

Nin kera cekoroba doye. Atogotun ye
 Burama KULUBALI ye.

Burama ye muso do furu, nka muso
 nin ma den si soro a ye, fo denke
 kelen. O den kelen, ala y'a ke
 kodonnaba ye Den in be ko don i n'a
 fo Burama yere. Dugu kono ni kolaben
 min sera, dugutigi be mogobila ka taa
 Burama no kan. Nin min bilala ka taa
 Burama no fe, o b'a fo:
 «Burama, dugutigi k'i ka na, ko
 Maladon celakawnanen» Burama b'o
 jaabi ko «ayiwa».

Don do la, Burama welelen, sann'a
 ka taa wele jaabi, a muso ye dumuni
 sigi. Burama y'a denke kelen wele,
 n'o ye fasun ye, k'a ka na u ka dumuni
 ke joona ko dugutigi b'a wele.

Dumuni kelen ko, Burama wulila ka
 taa dugutigi ka so. U ye koreko sigi.
 Burama denke wulila ka taa i munu-
 munu u dafe. A ye a fa sigilen ye,
 komi a fa dalasi ka ca, o bee norokolen
 donkini na, ay'a jok'a fa ye ko: «Baa,
 misiw yerekelen be malo foro la», fa
 ko: «N den, filake kamalen duuru be
 se k'u ladon wa?». Denke ko owo. O
 kelen na, Burama ye i bolo ke k'a da
 lace, kini bora la. Yala Burama de be
 kodon wa, teri a denke de be kodon?

Siyantigi KONATE,
 Farafinfurake baarada
 Bamako (Mali).

Nsanaw:

- Ni tasuma be i fa an'i yere bonbonsi
 la, i b'i ta de fofaga ka soro ka i fa ta
 faga.

- Kono fan yegobe-yegobe kojugu
 b'a ci
 - koro kojugu de be na ni sarajugu ce
 ye, n'o te fa-sogo-la don be se.

Nuhun KOYITA
 Farafinfurake Baarada
 Bamako (Mali)

Kuma koromaw

- Foro kono fen jumen kun ka jan ni
 foro kono fen bee ye?

- Fen bee be don u siso kono u nefe, n
 ka nin fen nin be don a siso kono a
 kokan. O ye mun ye?

Nanbala KULUBALI,
 Animateri ka bo kelen,
 Kaaba (Mali).

Segen

Bana jumen ka jugu ni segen ye?
 Segenbagato ni mone, a ni dusukasi
 Jon be na segen fo e ye
 E ti miiri ko hadamadenya ye hakili
 ye

Ni min banana k'o furake
 E jinen kelen
 Don min na e be na dije na!
 Ni nogondeme tun te e be bi soro?
 E ti miiri ko miiri ye mogoya ye!
 E ma segen don,
 Do koni y'a don,
 An ka nogon deme
 O be na ni kenya caman ye
 Nogondeme de nogon te.

Solomani KEYITA
 OMS Bamako (Mali)

Mali jamana ye Faso kelen, kunti-lenna kelen naniya kelen.

Fasojobaara ye fasoden bëe ka cësiri de ye.

Don o don cësiri te wa ?

O te sabati fo ni bëe y'i seko damajira ke.

Géleya si man kan k'an jiné faso kanu koro n'a girinna ko.

Demén bëe la, nimisa te min na, o te yere demén de ye wa ?

An kelen kelen, ce ni muso, denmisén ani mogokoroba, mogosi man kan k'i yere ka baara fisay'a ma, sabu : an danbe, an ka keleja an'an ka yeredon be soro baara in de kono.

Walasa an ka faso in ka bo nogola, an ka kan ka cësirijalaw kuraya, k'i sinsin n'a m'a ke, an ka horjona n'an danbe lagosili ye.

Fasoden bëe mana u kanw ke kelen ye fasojobaara la, sika t'ola yéléma nafamaw be ke faso in kono.

An k'a don, ko wajibi don an k'an denw kalan walasa u ka ko koro n'u danbew don, ka fasokanu don u dusukun na.

An k'u kalan faso nanfolo n'a ka cake minew lakanali cogo numan na, k'u kalan faso baara la, ka segin tugun k'u kalan faso sekow n'a donkow sabatili n'u yiriwali taa sira numan la.

Kabini an y'an yere ta, an kalikan kera ko taa faso yiriwa k'a bo nogola. N'an y'an yere ta cogo si la anmankank'anjigi ke mogowereye tugun. N'an y'an yere ta, f'an k'an kalikan de tiimee.

Faso kanubagaya

O te tiimee ni bëe ma faso kanu ni fasojo walew ke hali n'a y'a soro o walew ke to, an ni de be to a dafe. Hakilina juman fere juman, foko juman kuma juman ani jumija juman site sira sorofo ni këbagaw y'u yere don faso den ye min y'a ka faso danbe ,n'a bo nogola an'a kunkorota fisaya a yere kun ye. Géleya si mankan ka limanana tila an na fo ka fasokanw b'an dusukun na.

Walasa ka faso kanu sinsin, jekabaara ni jekakafo wajigiyalen don an kan.

An k'a don fana ko jamana ka sini jësigi be soro bi baaraw ke cogo juman de la, baara min kalifara fasoden ladiriw ma, u k'a file ka faso jetaasira taama.

Mogo kana mogo bali faso baara la ko muso don.

Taafé siri te sebe sa, sintigiya te sebe sa, dusukun tanja de ye monye.

Mogo k'ani faso bila janijugu ye, jani jugu bana sa.

An tun be jo sene an t'o kini dumun an tun be malo sene an t'o kini, an tun be tiga sene an t'o tulu dumun, an tun be koori sene an t'o fini siri.

Nkan sisan nin fen bëe kera an ta ye. An ka duguyiriwatou sabati-

ra, u be sannifeere ke, u be duguw kungo werew janabo. Nin bëe ye faso kanu wale dow ye.

An ka kalan ke, an ka seneké, an ka fasojobaara raw bëe ke walasa an k'an senbo jona ni sëgenba la. Ne ka foli be an ka kanw kalannaw n'u la fasabaa bëe yen.

An k'an jija sebenni fe, sabu hakili sinsinnan ye seben de ye, an ka kanw sebenni be do fara an danbe kan.

An ka don fana ko kalon suguya bëe in'a fo : (alizeburu, bigolozi shimi filozofi ani sabahana mansikalan : ordinateur be se ka ke anw ka kanw na n'an y'u miné an sebe la.

A cekani mogo faamuyaléenw k'a sigika jinini bëe k'olubamaye lema an kanw na.

Ne burama Sidibe y'an ka kanw kalambaga n'u kanubagaba de ye. N'be mogow jinina n'be se ka fara minnu kan walima minnu be se ka fara ne kan walasa k'a an ka kanw kalanni kunnawolo.

Ukana ke mogodamadou ka kalan ye.

N'ka folika bëe Kibaru sebennikelaw bëe ye.

Ne ka baara kanuba de be n'ma, wa a kecogo juman te kongan.

Ala ka Mali, an faso taa ne k'a kunnawolo.

Burama SIDIBE Sirakorola
C.A.R. Jemogó n'a balikukalan
karamogó Kulukoro mara la.

(Mali)

Latige

Sunkalo sanogo kalanden jolen yiringaso. Ne nisondiyalen de be letere in ci aw ma. Nin ye Ala ka latige, do ye n'a kere do ye, n'a kere lawale la.

Ce do n'a dogoke tun ye foro sene ko do kofe. U ye kaba sene foro kono. Kaba nana se konon gen ma. Koroke tora ka taa kono gen. U ka (ciipori) nana se, n'o y'u ka dugu neñajeba ye, dunanw nana ka caya dugu yoro bee la. Karidon sogomadafe. Koroke taara kono genna. San jiba nana, ka yoro bee la bo. Ko ni lekonona bee kera ji ye, tile be koroche cogo min lekonoji be caya ka taa fe. O ye koroche konogan. A wulila k'a be taa so. A nana surunyan pòn na tumami na, o y'a soro jiye ponda tugu. A desera k'i joyen, a kakule, kakule, o y'a soro musow be finiko la, le da in fe, Olu y'a men. Musow fana kulela ka kule. Jama y'o men, jama girinna ka bo dugu kono. Bee y'i kan to kulekan be bo min ? Musow k'a be bo yan fe ji la. Jama girinna ka, don ji la. Sanni a ka se ji cema, cela, mogo desera, k'a to to mogo karogelenw ye. O taara, fo ka surunya a la, u ma se a ma, olu fana desera, ka jo.

U y'a nyinika : e jõnni don ? A y'i kanto : ne don. A dogoke tun be mogo karogelenw na. O ko : he ne koroche tun taara kono gen na a le don. Dogoke ko an ka juru nini, k'o fili a ma, n'a y'o mine, an n'a-sama ka bo. Sani juru kana dogoke tora sensenna ka taa fe. Koroche jolen tora ji cema, k'i kanto dogoke ma /, nin sera yoro minna, bee ni dakan don, ne tena se ka bo. Taa so, i k'i janto n'muso ni denmisew na /. Ni Ala ye min latige, o de be ke. Juru nalen, ka di dogoke ma, a ye juru kun mine, k'a to fili koroche ma. K'a be juru mine tuma min na, ji y'a talon, k'a bin ko dingue kono. Dogoke jora k'i miiri. O y'a soro bannasun do jolen be pon tilebin fe. Dogoke y'i sensen, ka t'i jo bannasun jula. Dooni, koroche nan i kun bo bannansun jukoro, ka ben ni dogoke ye. A y'a sawo k'a mine, k'a jo bannansun ju la. U mogo fila jolen toro yen, bannansun jula, ji cema. Jama ne b'u fila jolen na, mogo si te se k'u masoro. Jama tora ka ham : nin kera an bolo ko ye de, haa, hun hun de. Ala ka ko do. Jama desera, fo ka taa so. U fila tora yen, tile be ban cogo min ji be jigin ka ban. U mogo fila nana so kono. Dugujelen, ninikaliw cayara fan bee fe, u ce fila tora karamogo jaabi, ala ka latige de nana ni anw ye, ji ba in bee temena, ka anw jolen to bannansun ba in jula.

Sunkalo Sanogo Kalanden jolen
ka bo Yiringaso Bilenjo mara Sikaso. (Mali).

Kokorobo

Nin kera kamalen saba ye.

U dakojugu u yere la, u tigera dije fen bee la sa, fo u yere. Bananake do tun be u kerefe dugu do la, o tun ye somaden kogolen ye. O yoro lamini bee sonnen tun b'o ye, ko a be don. Kamalen saba in ko : u ma d'a la mogow be ka min fo bamananke in kan, ni tine don. Anw ben'a korobo bi ni tine don. U ce saba ko : kelen k'i da, ka fini biri a la, u be taa a fo bamananke ye, ko u ka mogo man kene; bana menna a la ko jugu, i kana a dogo an na. U saba benna o kan. Kelen y'i da ka birifini biri a la k'a kun tugun. To fila taara bamananke fe yen. U y'a soro bamananke sigilen be a ka ceso da la; kamalenw ko : an fa, aq konogannen sera i ma. Bana do be antognonke la, a menna ante ka fura soro a la. Suro, an sira an neñan, a ma se ka sunogo, bana juguya fe.

O tuma, i be cenda an ye, n'a be bo bana in na, i k'o fo, ni a te bo bana in na yere, i kana a dogo an na. N'o te, an koni dabali ban na. Bamananke ye cenbuguri yere. A y'i bolodon buguri la doron, a sinna ka don, ko u nana kokorobo la. N'o te banabagato tu bolo. Bamananke y'i kun komi, ka wuli k'i bolo don a ka npalan kono, ka bo ni furamugubilen do ye, k'o funfun cenbuguri la, ka cenda.

A ye laturu so 16 nininka, a ko : et denmisew, a ka banabagato in te bo a ka bana in na.

Kokorobola fila in ye nogon laje, ka yele u yere kono. U ko an n'ya men. Uko ce ma : fura t'a la, an ka t'o bo walasa a be kisi ? Cendala ko: furabo tuma temena. Sarakabo tuma temena. Wa ni aw ma teliya ka taa so, a b'a soro a sara.

U ko wa anw bena taa. Anw nakun tun ye nin ye, i ni ce. Kabin'u bora du kono, u sinna ka yele, k'u tegew ci nogon tege : ce i m'a ye, k'a te fen don wa ! U ni mogo o mogo benna furance la, u ye bamananke in lagosi a bee ye. U selen so, u y'u jo soda la : ce, wa e ka bo, y'a fo a ye nk'a te fen don. Bo, an ka taa an ka baara la. A te se foyi la. Jaa ce salen menna. U t'a don, ka fo a sara.

Kabini cendala be furamugubilen funfun cenbuguri la tuma min, o ye ce satuma ye.

U y'a wele, k'a wele, a ma kuma u fe. U donna so kono, ce dalen be k'a kun tugun. U ko : ce i be sunogo wa ? A ma kuma u fe, do ye fini sama, ka bo a la, o ye ce salen don, u girinna, u si ma bo si ne soda fe. U fila jera ka bo da fe sine kelen, u si ma tu si la.

Ne be min bee don, o be so; n'y'e se nin na, i n'o b'i yaala.

Ni mogo m'i yere don, i t'i si damadon.

Ale koni bonena a ni na, fila y'u ka dije duman ke.

Negeta Kulubali
Balikukalan karamogo Banani Dunba (Mali).

Musa ka fanga binna

Fanga kɔɔ mɔgɔw bɛe lamaralen kɔfɛ, sɔrɔdasi jekulu ani siwili jekulu mɔgɔw bɛe nna jekuluba kelen sigili la senkan ko : «CTSP».

O jekuluba de ka kan, teliya la, ka jamana taacogo kura baaraw dantigɛ, k'u waleya, walasa, sɔrɔdasiw ka kow latemén siwiliw ma joona. Minisiri fɔlo Sumana SAKO sigira o kan de kan.

San 1992 kalo fɔlo ,walew ka kan ka latemén siwiliw ma, n'o ye baarakelaw ani fasojamatɔn w ni lakɔlidew ni kalandenw ye. Nka, dusukasi minnu ye mɔgɔw labɔ, o kera tijeliw ni fagaliw ye.

Olu «naama» de ye Musa Tarawele n'a nɔgon mɔgɔ nijuguw, tulomagelenw ni karogelenw bɛe kelen-kelen labanko juguya ka jahamana takise jigin u kan.

Ala k'an kisi ni nɔgon jahadi ma, ka jamana sɔrɔ n'a hɛre yirawa, a wolodenw ka jekawale kadara kɔnɔ.



Jamana kow lateménjekulu «CTSP» mɔgɔ 25

C.R.N :

- 1 - Lt koloneli Amadu Tumani TURE
- 2 - Lt koloneli Umaru JALO
- 3 - Lt koloneli Usmani MAYIGA
- 4 - Lt koloneli Bakari KULIBALI
- 5 - Lt koloneli Kafuguna KONE
- 6 - Komandan Anatoli SANGARE
- 7 - komandan Musa JABATE
- 8 - Komandan Aruna TARAWELE
- 8 - Komandan Yaya WATARA
- 10 Mèdesen komandan Mohamedi KULUBALI

U.N.T.M. :

- 11 - Bakari KARAMBE
- 12 - Boyise TARAWELE
- 13 - Usmani JARE

ADMA

- 14 - Abudarahamani Baba TURE
- 15 - Mamadu Lamini TARAWELE

C.N.I.D. :

- 16 - Hamidu JABATE
- 17 - Modibo JAKITE

A.M.D.H. :

- 18 - Metiri Dénba JALO
- 19 - Metiri Amadu DANTE

A.E.E.M. :

- 20 - Umaru MARIKO

A.J.D.P. :

- 21 - Musa KEYITA

J.L.D. :

- 22 - Umaru WAGE

ADIDE :

- 23 - Sidi KAMARA

M.P.A. :

- 24 - Sheki Agi BAYI

F.I.A. :

- 25 - Hamedi Sidi Amédi